

毘婆沙論

卷八

三百六十四  
分八

50368



Handwritten text in the bottom right corner, possibly a signature or date.



阿毗曇毗婆沙論卷第八

北涼沙門浮陀跋摩共道泰譯

雜捷度智品之三

問曰次第緣體性是何答曰如波伽羅那說  
除過去現在阿羅漢最後心諸餘過去現在  
心心數法是也復有說者諸過去現在心心  
數法是次第緣體性問曰若然者阿羅漢最  
後心無次第緣義云何名次次第緣耶答曰不  
以阿羅漢最後心過故餘心不生更有餘事  
故今後心不生若當生者能與次第緣問曰  
次第緣者有何相耶答曰所言體性即是其  
相所言相者即是體性一切諸法不可離體





性別立其相尊者和須蜜說曰相避義是次第緣復有說者發跡相避義是次第緣復有說者能生心義是次第緣復有說者心相續義是次第緣復有說者能取義是次第緣復有說者心勢用義是次第緣尊者佛陀提婆說曰次第生心相是次第緣復有說者未生刹那今刹那生是次第緣阿毗曇人說曰異相法今俱生是次第緣復有說者未生法似自己是次第緣已說次第緣體相未說所以以何等故名次第緣答曰等無間義是次第緣問曰若然者心與心作次第不與數法作次第耶數法與數法作次第不與心作次第

耶荅曰如說相似法沙門所說心與心作次第受與受作次第如是說者則有過所以者何貪欲心還與貪欲心作次第瞋恚還與瞋恚愚癡還與愚癡善還與善不善還與不善無記還與無記如是說者則無解脫涅槃如是說者好所謂心與心作次第亦與數法作次第數與數作次第亦與心作次第前心聚與後心聚作次第問曰若心與心作次第則相隨順非數法耶若數法與數法作次第則相隨順非心耶荅曰若如說相似法沙門所說心隨順心數法隨順數法評曰不應作是說作如是說者好所謂心與數法作次第數



法與心作次第前心聚與後心聚作次第等  
無差別猶如豆聚如波伽羅那所說若法與  
彼法作次第或時不作次第耶荅曰有若彼  
法未生問曰此說未生爲前者耶爲後者耶  
爲如前法未生後法不名次第若生是次第  
耶復如後法未生前法不名有次第若生是  
有次第耶如世第一法苦法忍作次第爲如  
世第一法未生苦法忍不名次第若生是次  
第耶復如苦法忍未生世第一法不名有次  
第若生是有次第耶若前法未生後法不名  
次第若生是次第者有心時可尔無心時云  
何可尔如入無想定滅盡定若一七若過一

七出定心與入定心名爲次第彼第二刹那  
心必生所以者何若法與彼法能作次第緣  
果無有衆生無有法無有呪術無有藥草無  
有佛無有辟支佛無有聲聞能遮此法使第  
二刹那心令不生者若然者二定則無體若  
當後法未生前法不名有次第若生是有次  
第若然者則苦法忍未生世第一法不名有  
次第何故說未生耶或有說者應作是說前  
法未生不名次第問曰若然者有心時可尔  
無心時云何荅曰有心時已尔無心時亦可  
尔其事云何如入無想定滅盡定彼入定心  
定初刹那亦取果亦與果諸餘刹那及出定



心但名取果彼入定心滅在過去定餘刹那  
及出定心其現在者與果彼不應作是說所  
以者何次第緣義無有異時取果異時與果  
即與果時取果問曰若與果時取果有心時  
可尔無心時云何荅曰如入無想定滅盡定  
彼入定心與定初一刹那取果與果彼滅在  
過去定餘刹那及出定心若現在前取果與  
果若作是說則無異時取果異時與果問曰  
若然者過去法則有所作荅曰雖過去有所  
作能取果與果而無有過過去世見色乃至  
知法無如是作事與果取果可有是事復有  
說者後法未生前法不名次次第後法若生則



前法名次第問曰若然者苦法忍未生世第  
一法不名次第耶答曰可名次第不名次第  
緣若苦法忍生是名次第亦名次第緣如次  
第次第緣次第有次第相續有相續依有依  
當知亦如是問曰未來世中有次第緣不耶  
若有者諸法應未來世中已次第任修正方  
便則無有用所以者何聖道於未來世中已  
有次第時到則生修正方便復何所爲復有  
大過何以故無有制伏貪欲生不淨觀如是  
亦不能制伏一切煩惱生對治觀若尔則無  
解脫涅槃乃至廣說若無者八分經去何通  
如說是人十三劫不墮惡趣乃至二十劫去

何知三業差別是現法報是生法報是後法  
報何以故一切時世第一法但生苦法忍何  
以不生乃至盡智等諸法何故金剛喻定但  
生盡智不生餘法答曰應作是說未來世中  
無次第緣問曰若無者則無前說諸過此八  
分經云何通答曰世尊觀過去現在以比相  
亦知未來世其事云何答曰世尊觀過去世  
見彼衆生修如此業尔所劫中不墮惡道見  
此衆生修如是業尔所劫中當不墮惡道見  
諸衆生於過去世修如是業於現世中受如  
此報見諸衆生於彼造業若受生報若受後  
報見諸衆生於此造業若受現報若受生報



若受後報復有說者衆生有相是心不相應  
行任衆生身中世尊不因禪定神通能知衆  
生身中有此法者尔所劫中不墮惡道即見  
此相知是衆生受現法報次受生報復受後  
報評曰不應作是說若作此說明如來唯有  
比相智無了達智應作是說佛世尊有了達  
智能知未來雖未來法亂無定次第如來以  
明淨智能知未來亂法無定次第知諸衆生  
造如此業經尔所劫不墮惡道受於現報次  
受生報復受後報悉實無謬如筭數法知於  
穀聚明了無謬何況如來有自然智問曰以  
何等故世第一法次生苦法忍不生乃至盡

智等諸法。答曰。此名數定事相不定。所以者何。苦法忍在於六地。未知爲是何地。苦法忍三根相應。不知定與何根相應。行於四行。不知定行何行。如住增上忍時。地行根定。刹那不定。所以者何。有多刹那。故不知生者。是何刹那。次第緣亦不定。住世第一法時。有五事定地。根行次第。刹那是名數定事。相不定。復有說者。若法依前法相續生。不必次第緣。猶如外物無次第緣。依於前法相續而生。如牙依前種相續得生。乃至果依前華相續而生。內法亦尔。不因次第緣。依於前法相續而生。苦法忍依世第一法。故相續而生。餘乃至盡。



智不依世第一法故是以不生金剛喻定亦應如是通然未來世法屬於現在若於現在和合則生若不和合不生世第一法後能生修道無有是處以分別故設當世第一法與修道和合尔時則生以不與和合故是則不生如是苦法忍屬世第一法故生餘乃至盡智不屬故不生復有說者未來世中有次第緣問曰若未來世有說次第緣諸法應次第住荅曰未來世中有次第緣義無次第住未來世法應從何次第緣生者已定然不次第住後若生時從何緣生亦定次第住亦定猶如衆多比丘亂住一處臘數已定行列不定

後次第住時臘數亦定行列亦定如是法未  
生時應屬何緣生者已定次第住不定後若  
生時從緣生亦定次第住亦定問曰若然者  
修正方便則無有用亦無解脫涅槃答曰一  
心次第略說有二種心當生所謂善與染污  
若修正方便善心便生染污不生若行邪方  
便染污心便生善心不生如一種子後二種  
當生所謂牙與爛壞若遇生牙因緣則便生  
牙若遇爛壞因緣則生爛壞一心次第生二  
種心亦復如是評曰應作是說未來世中無  
次第緣所以者何次第緣者是次第住法未  
來世中無次第住次第緣者是不亂法未來



世亂復有說者若未來世有次第緣者修善者常應修善不應作惡若修惡時常應作惡不應修善今現見提婆達多本欲修善而後作惡央掘魔羅氣噓惡人本欲作惡而後修善以如是等因緣故知未來世無次第緣問曰以何等故色法無次第緣答曰或有說者若法定有所依定有所行定有所緣故有次第緣色法無有所依無所行無所緣是故無次第緣復有說者若法是相應有所依有所行有勢用有所緣故有次第緣色法不相應無依無行無勢用無緣故無次第緣復有說者次第緣者是次第住法色非次第住法或二

萬劫或四萬劫或六萬劫或八萬劫斷絕者  
復有說者次第緣現在前時不亂色法現在  
前時得如一時中起欲色界繫色現在前欲  
界繫不繫色現在前色界繫不繫色現在前  
是故尊者須蜜說曰欲界增益色未減色  
界增益色生尊者佛陀提婆說曰少色無間  
生多色多色無間生少色彼少色無間生多  
色者如空中雲少便生多如小種子生於大  
樹如小迦羅羅後成大人多色無間生少色  
者如燒大草積後生少灰以少色無間生多  
色多色無間生少色故無次第緣問曰如心  
數法少無間生多多無間生少其事云何答



曰如無覺無觀地次生無覺有觀次生有覺  
有觀如此名少無間生多有覺有觀地生  
無覺有觀次生無覺無觀如此名多無間生  
少荅曰不應以地定應以數法定若一受次  
第生二受若二受次第生一受有如上過以  
不生故無如上過問曰以何等故心不相應  
行無次第緣荅曰或有說者若法定有所依  
定有所行定有所緣故有次第緣心不相應  
行不尔色法二界繫心不相應行三界繫餘  
如上色法說問曰以何等故說無想定滅盡  
定是心次第不說無想定天荅曰或有說者亦  
應說而不說者當知此是有餘之說復有說

者若用功難得者說不用功不難得者不說  
復有說者若是善者說彼是無記故不說問  
曰以何等故無想定滅盡定是心次第而非  
次第緣耶荅曰或有說者若法能生心能增  
益心能取心是次第緣彼定生時住心礙心  
使心不相續是以不作次第緣復有說者此  
定斷心遮心行處是不相應無勢用法是以  
不作次第緣問曰入無想定滅盡定心出定  
心是其次第中間有介許多相續定云何是  
次第荅曰此中更無餘心故得名次第猶如  
有人一在前行一在後來他人問言彼後來  
人與誰共來其人荅言與某甲人次後而來



彼二中間雖有村落樹木畜生等物更無餘  
人故言次第如是彼二心中間雖復曠遠更  
無餘心故得名次第問曰諸法是心次第亦  
是無間耶荅曰或有是心次第非心無間有  
是心無間非心次第有是心次第亦心無間  
有非心次第非心無間是心次第非心無間  
者除定初刹那及餘有心法諸餘定及出定  
心是謂心次第非心無間是心無間非心次  
第者定初刹那及餘有心法生住無常是謂  
心無間非心次第是心次第亦心無間者定  
初刹那諸餘有心法是謂心次第亦心無間  
非心次第非心無間者除定初刹那及餘有

心法生住無常諸餘定刹那及出定心生住  
無常是謂非心次第非心無間問曰諸是心  
次第亦是定無間耶答曰應作四句是心次  
第非定無間者謂定初刹那諸餘有心時是  
謂心次第非定無間是定無間非心次第者  
除定初刹那及餘有心法生住無常諸餘定  
及出定心生住無常是謂定無間非心次第  
是心次第亦定無間者除定初刹那及餘有  
心法諸餘定及出定心是謂心次第亦定無  
間非心次第非定無間者定初刹那生住無  
常及餘有心生住無常是謂非心次第非定  
無間觀有三種所謂別相觀揔相觀虛相觀



別相觀者觀色是色相乃至觀識是識相觀地是堅相乃至觀風是動相是名別相觀揔相觀者十六聖行觀是名揔相觀虛相觀者不淨安般無量除入解脫一切處是名虛相觀問曰此三種觀何觀次第能入聖道出聖道時何觀最初現在前答曰或有說者入聖道時三種能入出聖道時三種現在前後有說者揔相觀能入聖道出聖道時三種現在前問曰若虛相觀不入聖道此經云何通如說不淨觀次修念覺意答曰此說展轉相因如子孫法其事云何答曰先以不淨觀善調伏心使心止息堪任質直柔軟心得自在然後

揔相觀現在前能入聖道復有說者揔相觀  
現在前能入聖道出聖道時亦揔相觀而現  
在前問曰若然者若依未至若依初禪若依  
中間得正決定出聖道時欲界揔相觀現在  
前可尔若依二禪三禪四禪得正決定彼無  
欲界揔相觀所以者何以大遠故復更不得  
揔相觀除達分善根所以者何以聖道後不  
能復起現在前故出聖道時爲起何等揔相  
觀現在前答曰於暖頂忍中間修揔相觀所  
謂諸行無常苦空無我涅槃寂靜出聖道時  
此觀現在前評曰不應作是說如前說者好  
欲界有三種觀所謂聞慧思慧生得慧色界



有三種所謂聞慧修慧生得慧無色界有二  
種修慧生得慧問曰欲界有三種觀慧何等  
慧現在前能入聖道答曰欲界思慧觀現在  
前能入聖道出聖道時三種觀現在前色界  
修慧觀現在前能入聖道出聖道時二種聞  
修慧觀現在前非生得慧無色界修慧現在  
前能入聖道出聖道時亦修慧觀現在前非  
生得慧問曰以何等故出聖道時欲界生得  
慧現在前非色無色界答曰欲界生得慧猛  
利色無色界不猛利若依未至禪得阿羅漢  
出聖道時還起未至地及欲界心若依無所  
有處得阿羅漢出聖道時還起無所有處及

非想非非想處心若依餘地得阿羅漢出聖  
道時即起彼地心初禪有三種味淨無漏乃  
至無所有處亦三種非想非非想處二種味  
淨味相應次第生味相應及淨不生無漏淨  
有三種無漏二種淨及無漏不生味淨初禪  
有四種有退分住分勝進分達分乃至非想  
非非想處亦有四種退分次第生退分生住  
分不生勝進分不生達分住分次第生住分  
生退分生勝進分不生達分勝進分次第生  
勝進分生住分生達分不生退分達分次第  
生達分生勝進分不生住分退分復有說者  
退分次第生三種不生達分住分勝進分盡



生四種達分次第生三種除退分問曰若生  
二禪三禪四禪地欲入初禪識現在前幾種  
觀現在前荅曰隨所住地未離欲者三種觀  
現在前所謂善染污不隱沒無記出時亦三  
種現在前若離欲二種有十二種心欲界繫  
四種善不善隱沒無記不隱沒無記色界繫  
三種善隱沒無記不隱沒無記無色界繫亦  
三種學無學心問曰欲界繫善心次第生幾  
心復從幾心次第生乃至無學心次第生幾  
心復從幾心生荅曰欲界繫善心次第生九  
心欲界繫四色界繫二善隱沒無記無色界  
繫一隱沒無記學無學亦從八心次第生欲

界繫四色界二善隱沒無記學無學不善心  
次第生欲界四心亦從十心次第生欲界繫  
四色界繫三無色界繫三隱沒無記心亦如  
是欲界繫不隱沒無記心次第生七心欲界  
四色界二善隱沒無記無色界一隱沒無記  
亦從五心次第生欲界四色界一善心色界  
繫善心次第生十一心除無色界繫不隱沒  
無記心餘次第能生亦從九心生自地三欲  
界二善不隱沒無記無色界二善隱沒無記  
學無學心色界繫隱沒無記心次第生六心  
色界繫三欲界三除不隱沒無記心亦從八  
心次第生色界三欲界二善不隱沒無記無



色界三色界繫不隱沒無記心次第生六心  
色界三欲界二不善隱沒無記無色界一隱  
沒無記亦從色界三心次第生無色界善心  
次第生九心無色界三欲界二不善隱沒無  
記色界繫二善隱沒無記學無學心亦從六  
心次第生無色界三色界一善心學無學心  
無色界繫隱沒無記心次第生七心無色界  
三欲界二不善隱沒無記色界二善隱沒無  
記亦從七心次第生無色界三欲界二善不  
隱沒無記色界二善不隱沒無記無色界繫  
不隱沒無記心次第生六心無色界三欲界  
二不善隱沒無記色界一隱沒無記亦從無

色界三心次第生學心次第生五心欲界善  
色界善無色界善學無學心亦從四心次第  
生欲界善色界善無色界善學心無學心次  
第生四心欲界善色界善無色界善無學心亦  
從五心生欲界善色界善無色界善學無學心  
九八四與十 七五當知欲 十一九六八  
六三當知色 九六七亦七 六三知無色  
五四亦四五 當知學無學  
有二十種心欲界有八心方便善心生得  
善心不善心隱沒無記心威儀心工巧心  
報心通果心色界有六心方便善心生  
得善心隱沒無記心威儀心報心通果心



無色界有四心方便善心生得善心隱沒  
無記心報心無漏有二心學心無學心問曰  
欲界方便善心次第生幾心亦從幾心次第  
生乃至無學心次第生幾心亦從幾心生答  
曰欲界方便善心次第生十心欲界七除通  
果心色界一方便善心學心無學心亦從八  
心次第生欲界四方便善生得善不善隱沒  
無記色界二方便善隱沒無記學無學欲界  
生得善心次第生九心欲界七除通果心色  
界隱沒無記心無色界隱沒無記心亦從十  
一心次第生欲界七除通果心色界二方便  
善隱沒無記學無學不善心次第生欲界七

心除通果心亦從十四心次第生欲界七除  
通果心色界四生得善隱沒無記威儀報無  
色界三除方便善隱沒無記心亦如是欲界  
威儀心次第生八心欲界六除方便善通果  
心色界一隱沒無記心無色界一隱沒無記  
心亦從七心次第生欲界七除通果心報心  
亦如是工巧心次第生六心除方便善通果  
心亦從七心次第生欲界七除通果心欲界  
通果心次第生二心欲界通果色界方便善  
心亦從二心次第生欲界通果色界方便善  
心色界方便善心次第生十二心色界六欲  
界三方便善生得善通果心無色界一方便



善學無學心亦從九心次第生色界四除威儀心報心欲界二方便善通果心無色界一方便善隱沒無記學無學心色界生得善次第生八心色界五除通果心欲界二不善心隱沒無記無色界一隱沒無記心亦從色界五心次第生除通果心色界隱沒無記心次第生九心色界五除通果心欲界四方便善生得善不善隱沒無記心亦從十一心次第生色界五除通果心欲界三生得善威儀報心無色界三除方便善色界威儀心次第生七心色界四除方便善通果心欲界二不善隱沒無記心無色界一隱沒無記心亦從五

心次第生色界五除通果心報心亦如是色  
界通果心次第生色界二方便善通果心亦  
從二心次第生色界方便善通果心無色界  
方便善心次第生七心無色界四色界一方  
便善學無學心亦從六心次第生無色界三  
除報心色界一方便善學無學心無色界生  
得善次第生七心無色界四欲界二不善隱  
沒無記色界一隱沒無記心亦從無色界四  
心次第生無色界隱沒無記心次第生八心  
無色界四欲界二不善隱沒無記心色界二  
方便善隱沒無記心亦從十心次第生無色  
界四欲界三生得善威儀報心色界三生得



善威儀報心無色界報心次第生六心無色  
界三除方便善欲界二不善隱沒無記心色  
界一隱沒無記心亦從無色界四心次第生  
學心次第生六心欲界二生得善方便善色  
界一方便善心無色界一方便善心學無學  
心亦從四心次第生欲界一方便善心色界  
一方便善心無色界一方便善心學心無學  
心次第生五心欲界二方便善心生得善心  
色界一方便善心無色界一方便善心無學  
心亦從五心次第生欲界一方便善心色界  
一方便善心無色界一方便善心學無學心  
十八次生九 十一生於七 十四亦生八

七六及與七 二生二欲盡 十二十八五  
九十一七五 二二當知色 七六七四八  
十六四無色 六四亦五五 當知學無學  
以何等故如人不可得乃至廣說問曰何故  
作此論答曰爲止他人意故或有說者有人  
以有人故憶本所作復有說者物性相入相  
入論者作如是說一切有爲法有二分若晝  
若夜夜時晝入夜中晝時夜入晝中所以者  
何如夜中所作晝則憶之以夜入晝中故如  
晝中所作夜則憶之以晝入夜中故是故憶  
本所作或有說者物性變物性變論者作如  
是說迦羅羅變作阿浮陀乃至中年變作老



年是故憶本所作如婆吒樹葉青變爲黃彼  
亦如是或有說者物性往來往來論者作如  
是說迦羅羅來至阿浮陀中住故乃至廣說  
以是事故憶本所作問曰物性變論往來論  
有何差別荅曰物性變論言迦羅羅變作阿  
浮陀往來論言迦羅羅來至阿浮陀中住俱  
增長故或有說者覺是一性後所知覺即是  
前所作覺或有說者境界是常以境界常故  
憶本所作或有說者有根本陰有客陰客陰  
所作根本陰能知以是故能憶本所作或有  
說者前心往後心語後心我作如是事是故  
憶本所作恒河沙數諸佛及佛弟子不作此

論言有人不言物性相入不言物性變不言  
物性往來不言覺性是一不言意境常不言  
有根本陰客陰不言前心往後心然能憶本  
所作如此事微細甚深難知為顯如此微細  
甚深難知法故而作此論問曰以何等故唯  
說如人不可得前心不往後心言我有所作  
而能憶本所作答曰應如是說以何等故人  
不可得物性不相入物性不變物性不往來  
覺性不一意境不常陰性無根本無客陰前  
心不往後心而能憶本所作而不說者欲現  
始終略其中間令經文易故若說如人不可  
得則止有人者意前心不往後心則止往來



論者意前心後心則止其餘諸論者意答曰  
衆生之法得如是相似習智問曰前言無人  
今何以言衆生答曰欲令所說與法體相順  
故所以者何若不言衆生但言法法於義雖  
順於文不便若言衆生文義俱順以是故說  
於衆生復有說者前說實義今說假名衆生  
之法得如是相似習智習智者是決定是修  
習是自在義本所作者隨其本事本事者如  
其性如其體如其相如其物復有說者應言  
憶本共作云何共作如本所見曾所更復有  
說者應言憶本作事云何本作事隨本形色  
本所爲欲明憶本所作義故而作此論喻如

能書者乃至廣說如能書者不至彼能書者  
所問言汝作何字彼亦不答我作是字然能  
書者得如此所習智自所作字亦知他所作  
字亦知乃至海外書來亦能讀知如是前心  
不往後心然後心能憶本所作復欲重明此  
義故更作喻如二知他心展轉相緣此亦不  
問彼汝思何事彼亦不答我思此事乃至百  
由旬外二心而能相知如是前心不至後心  
後心而能憶本所念

阿毗曇毗婆沙論卷第八

分

臘郎塔  
及 虛音



